



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXIX Blg. 9
Mayo 7, 2008
www.philippinerevolution.net

Editorial

Mga manggagawa at malawak na masang anakpawis

Magkaisa, lumaban at magkamit ng mga tagumpay



Karukhaan, kagutuman at pambubusabos. Matinding kawalan at kakulangan ng trabaho. Sahod alipin. Malulupit na kalagayan sa paggawa at pamumuhay. Papalalang dinaranas ito ngayon ng malawak na masa ng sambayanang Pilipino, laluna ng masang manggagawa, malamanggagawa at mag-sasaka.

Samantala, nabubundat ang mga naghaharing imperyalista at kasabwat nilang malalaking kumprador at burukrata. Inaapi at dinadambong nila ang bayan, hinuhuthot ang likas na yaman, winawasak ang mga produktibong pwersa at kinukulimbat ang kabangyaman ng bansa.

Sa kabila nito ay patuloy na ipinapako ang sahod ng mga manggagawa sa napakababang antas. Itinutulak ng rehimen ang patakaran ng kaswalisasyon at kontraktwalisasyon na lalong nagpapalaki sa bilang ng mga manggagawang wala o kulang sa trabaho. Paparami ang sinisisanteng mga regular na manggagawa. Ginagawang panakip-butas sa malawakang disempleyo sa bansa ang pag-eksport ng milyun-milyong manggagawa.

Sa katindihan ng krisis, ibayo pang pini-piga, ginigipit at sinusupil ng mapagsamantala at brutal na rehimen at kasapakat nitong mga imperyalista at lokal na naghaharing uri ang masang anakpawis. Sadyang pinipigilan

**Mga tampok
sa isyung ito...**

Pagtanaw sa 35 taon
ng NDFP PAHINA 4

Mga opensiba
sa Southern Mindanao
PAHINA 8

Malawak na kagutuman
at kaguluhan PAHINA 11

ang makabuluhang pagtaas ng sahod ng mga manggagawa habang papalaki ang agwat nito at ng aktwal na kinakailangang halaga para sa disenteng pamumuhay.

Halos isang dekada nang igini-giit ng mga manggagawa ang makatarungang P125 karagdagan sa minimum na arawang sahod. Mas lalong kailangan ito sa kagyat dahil ang kasalukuyang nakatak dang minimum ay kulang pa sa sangkat-lo ng pangangailangan sa ngayon ng isang anim-kataong pamilya para mabuhay nang disente. (*Tingnan ang kaugnay na artikulo.*)

Militarisasyon at karahasan ang tugon ng brutal na rehimen sa mga pagawaan, komunidad, lansangan, asyenda, plantasyon at saanman may pagtutol ang mamamayan. Ilang milyon na ang nagiging biktima ng kamay na bakal ng estado.

Gagap ng masang anakpawis at sambayanan na nakaugat sa malakolonyal at malapyudal na sistema ang kanilang mga karaingang pangkabuhayan. Di na mapipigil ang sumasambulat nilang galit sa pagpapahirap at pandarahas ng naghaharing rehimen.

Sa saligan, ang Partido ay par-

tido ng uring manggagawa. Nakasalalay ito pangunahin sa lakas ng masang manggagawa at masang anakpawis. Dapat pag-ibayuhin ang rebolusyong pagmumulat, pag-oorganisa at pagpapakilos sa milyon-milyong manggagawa, malamanggagawa, magsasaka, gayundin sa

mababang saray ng petiburgesyang mabilis na bumabagsak sa hanay ng masang anakpawis. Palakasin ang pagrerekluta sa kanila sa Partido, Bagong Hukbong Bayan at sa mga rebolusyonaryong organisasyong masa.

Itulak at gabayan ang kanilang hayagang mga paglaban upang tiyakin na ang mga ito ay hindi lamang magbubunga ng mga kagyat na kaghinawaan, kundi hahantong din sa tuluyang pagwawaksi ng umiiral na antinasyunal, anti-demokratiko at anti-mamamayang paghahari.

Dapat pag-ibayuhin ang pagpapalakas at pagtatatag ng mga unyon ng mga manggagawa at samahan ng mga magbubukid, manggagawang bukid at iba pang mala-



manggagawa. Dapat bigyan ng partikular na atensyon ang patuloy na lumalawak na hanay ng mga wala at kulang ang hanapbuhay, kabilang ang lalong dumaraming kaswal at kontraktwal. Dapat gamitin ang mga

angkop na paraan ng pag-oorganisa sa kanilang hanay at pakikipaglaban para sa kanilang mga karapatan sa hanapbuhay at iba pang batayang interes.

Kaisa ng malawak na masa ng sambayanan, dapat puspusang palawakin ang paglahok ng masang anakpawis sa mga pagkilos laban sa rehimeng US-Arroyo. Habang isinusulong ang mga pangmatagalang paglaban para sa mga saligang interes at kapakanan ng mamamayan, dapat ding ipaglaban ang kagyat na ginhawa sa harap ng pumapaimbulog na presyo ng bigas, langis at iba pang saligang pangangailangan at kabuuang pagbagsak ng kabuhayan.

Dapat ding labanan ang panunupil, terorismo at karahasang ihinahasik ng malalaking panginoong maylupa, malalaking kapitalista at mga pwersa ng estado laban sa mga tumututol na mamamayan.

Ang puspusang pagmumulat, pag-oorganisa at pagpapakilos ay dapat paspasan habang lalong umiinit ang mga isyung nagpapatitindi sa kahirapan ng mamamayan. Inasahang hahantong ang mga pagkilos na ito sa mga darating na araw at buwan sa ibayo pang pagragasa ng digmang bayan sa buong kapuluan. Kasabay nito, inaasahan ang ibayong paglawak ng mga protestang masang maaaring humantong sa makapangyarihang pag-aalsang bayan sa pambansang sentro at sa buong bansa para panagutin ang rehimeng US-Arroyo sa mabibigat nitong krimen sa bayan. **AB**

ANG BAYAN Mayo 7, 2008



Taon XXXIX Blg. 9 Mayo 7, 2008

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.net

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial: Magkaisa, lumaban at magkamit ng mga tagumpay	1
Mayo Uno, 2008	3
Mayo Uno sa buong mundo	4
Pagtanaw sa 35 taon ng NDFP	4
Rebolusyong agraryo sa Negros	7
Mga opensiba sa Southern Mindanao	8
Pananalanta ng pasistang estado	
Pang-aabusong militar	9
Militarisasyon sa ComVal	
Mga sundalong sangkot sa Sulu masaker	9
Mambabatas sa Canada, nabahala	10
Rehimen sa Haiti, napatalsik	10
Malawak na kagutuman at kaguluhan	11
Balita	12

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

Mayo Uno, 2008

Libu-libong manggagawa, mga kawani ng gubyrno at kanilang mga tagasuporta ang nagbandera ng panawagang “Trabaho, Katarungan at Pagkain” sa Araw sa Paggawa nitong Mayo 1 sa iba’t ibang bahagi ng Pilipinas.

Sa Metro Manila, 7,000 manggagawa ang nagtipon sa paanan ng Mendiola. Nagprotesta rin ang 1,500 manggagawa sa Angeles City; 2,000 sa Bacolod; 3,000 sa Iloilo; at 2,000 sa Cagayan de Oro. Naglunsad rin ng mga protesta sa mga syudad ng Baguio, Cavite, Calamba, Legazpi, Roxas, Cebu, Davao at General Santos at sa mga bayan ng Kalibo sa Aklan at Polomolok sa South Cotabato.

Mariin nilang kinundena ang paghadlang ng rehimeng Arroyo sa panawagang isabatas ang P125 pagtaas sa sahod at P3,000 umento para sa mga kawani ng gubyrno. Tinuligsa rin nila ang pakana ni Arroyo na ipasa sa mga *regional wage board* (RWB) ang usapin ng dagdag sahod, ang pagbibigay ng 10% lamang na dagdag sa sweldo ng mga kawani ng gubyrno at ang iba pa niyang panloloko at pambabarat. (*Tsart 1*)

Sa kabila ng napakalaking kakulangan ng sahod ng mga manggagawa, walang balak si Arroyo na itaas ang sahod ng mga manggagawa nang lampas sa 10% mula sa kasalukuyang minimum o P36/araw. Nakaiinsulto rin ang 10% na idinagdag sa sweldo ng mga kawani lalupa’t nakabatay ito sa anda-andanang pagpapasweldo ng burukrasyang sibil. Halimbawa nito, ang isang dyani-tor na tumatanggap ng P5,590 bawat

Tsart 1: Arawang minimum na sahod bawat rehiyon kumpara sa kinakailangang sahod		
Rehiyon	Minimum na sahod	Kinakailangang sahod
NCR	P325- 362	P 858
CAR	P233-245	P 810
Region 1	P210-230	P 793
Region 2	P215-223	P 706
Region 3	P236-287	P 749
Region 4	P224-300	P 757
Region 5	P183-226	P 734
Region 6	P215-236	P 636
Region 7	P205-250	P 823
Region 8	P228	P 546
Region 9	P225	P 795
Region 10	P229-244	P 742
Region 11	P248-250	P 716
Region 12	P229	P 698
ARMM	P200	P1,186

Pinagkunan: National Wages and Productivity Commission

buwan ay madadagdagan lamang ng P559 habang ang isang presidente na tumatanggap ng P63,525 bawat buwan ay madadagdagan ng P6,352.

Ipinananakot ni Arroyo na ang anumang makabuluhang dagdag sa sahod at sweldo ay magpapataas sa presyo ng mga bilinghin. Nakaiinsulto ang pahayag na ito lalupa’t ang isa sa totoong nagpapataas sa presyo ng mga bilinghin ay ang pagpapataw ng gubyrno ng 12% *value-added tax* (VAT) sa batayang mga bilinghin at serbisyo. (*Tsart 2*)

Gayundin, inamin mismo ng mga ahensya ng gubyrno na hindi magiging kapaki-pakinabang sa mayorya ng mga manggagawa ang dagdag na sahod kung idadaan ito sa mga RWB. Bukod sa kontrolado ang mga ito ng malalaking negosyo, maraming negosyante ang di sinasaklaw ng mga kautusan nito. Walang pakundangan ding nilalabag ang

Tsart 2: Patong na VAT sa mga produktong petrolyo	
Bilinghin	Patong na VAT
LPG	P75/tangke
Diesel	P4/litro
Gasolina	P5/litro

Pinagkunan: Kilusang Mayo Uno

mga kautusan nito ng maraming malalaking negosyo. Sa limitadong estadistika ng gubyrno, isa sa bawat limang kumpanya ang lumalabag sa takdang minimum na sahod.

Ayon naman sa isang pag-aaral ng Unyon ng mga Manggagawa sa Agrikultura, balewala ang itinatakda ng mga RWB na minimum na sahod para sa mga manggagawang agrikultural. Marami sa kanila ang tumatanggap ng wala pa sa sangkatlo ng itinatakdang minimum ng mga RWB. (*Tsart 3*) Ang mga manggagawa naman sa mga komersyal na palaisdaan ay tumatanggap ng wala pa sa kalahati ng itinatakda ng RWB. (*Tingnan ang Tsart 4 sa p. 4*)

Tsart 3: Arawang sahod ng mga manggagawa sa agrikultura sa piling rehiyon		
Rehiyon/prubinsya	Minimum (RWB)	Aktwal
Central Luzon	P273	P120
Batangas/ST	P211	P35-150
Negros	P203	P30-200
Far South Mindanao	P205	P80-130

Pinagkunan: Unyon ng mga Manggagawa sa Agrikultura

Tsart 4: Sahod ng mga manggagawa sa pangisdaan para sa 20 oras na araw ng paggawa

Komersyal na <i>trawler</i> (pahinante)	P100-150
Komersyal na <i>trawler</i> (kapitan, pangalawang kapitan)	P150-180
<i>Aqua farm</i> (125-200 ektarya)	P200
<i>Fishpond</i> (12 ektarya pababa)	P120

Pinagkunan: Pamalakaya

Mayo Uno sa buong mundo

Ipinagdiwang ng mga manggagawa sa buong mundo ang Araw ng Paggawa sa pamamagitan ng mga martsa at rali. Sigaw nila ang itaas ang sahod, ibaba ang presyo ng mga batayang pangangailangan laluna ng pagkain at langis at sapat na trabaho.

Sa Cuba, mahigit kalahating milyon ang nagtipon sa Havana, kabisera ng bansa. Dumalo sa rali si Raul Castro, presidente ng bansa, na pumirma sa isang kautusang nagbibigay ng dagdag na pensyon at dagdag na sweldo sa mga kawani ng gubyrerno.

Sa Asia, nagrali ang mga manggagawa sa Jakarta, Indonesia, sa Singapore at sa Bangkok, Thailand. Naging sentro ng mga demonstrasyon dito ang pagsirit ng presyo ng pagkain at mga bilihin. Sumirit nang hanggang 300% ang presyo ng bigas kumpara noong nakaraang taon sa Thailand at nagbabadya ito ng kaguluhan.

Sa Tokyo, Japan, libu-libong mamamayan ang pinamunuan ng Partido Komunista ng Japan sa pagtutol sa bagong buwis sa langis. Naging marahas naman ang rali sa Istanbul, Turkey kung saan gumamit ang pulisya ng *pepper gas* at binomba ng tubig ang mga demonstrador. Daan-daan din ang hinuli sa martsa.

Sa Europe, pinangunahan ng mga makabayang kabataan sa Poland ang mga rali kung saan tinuligsa nila ang "globalisasyon." Mayroong mga rali sa halos lahat ng mga syudad ng Germany. Sa Greece, naglunsad ng malawakang welga ang mga unyon sa transportasyon at serbisyo publiko laban sa pribatisasyon at pagbawas ng pensyon. Kabilang sa mga nagwelga ang mga manggagawa sa dyaryo, radyo at telebisyon.

Sa US, nagmartsa ang maraming migrante laban sa kontraktwalisasyon at pagbabalewala ng gubyrerno sa mga karapatan ng mga migrante laluna ng mga Latin American at Asian. Bagamat mas maliit ang bilang nila ngayon kumpara noong unang martsa para sa Karapatan ng mga Migrante noong 2006, lahat halos ng mga syudad sa US ay naglunsad ng mga martsa at rali. Isa rin na mariin nilang panawagan ang pagtigil ng teroristang gera ng US laban sa Iraq at Afghanistan at pagtuon ng gastos sa gera tungo sa kagalingang panlipunan. AB



MGA ULAT KORESPONSAL


Pagtanaw sa 35 taon ng National Democratic Front of the Philippines

ni Luis T. Jalandoni
Pinuno, NDFP Negotiating Panel

Isinilang ang National Democratic Front of the Philippines (NDFP) sa gitna ng mabilisang paglago ng rebolusyonaryong kilusang masa noong 1971. Sinundan nito ang sunud-sunod na mga militanteng aksyong masa noong maagang bahagi ng 1970 na tinaguriang "First Quarter Storm." Umaabot na sa pagbulwak ang kumukulong paglaban sa rehimeng Marcos. Binuo noon ng Partido Komunista ng Pilipinas ang Preparatory Committee (PrepCom) ng NDFP.

Ilang buwan pagkalipas ideklara ni Marcos ang batas militar noong Setyembre 1972, lumitaw ang kampanyang "NO TO MARTIAL LAW." Inianunsyo ng NDFP PrepCom ang 10-Puntong Programa nito noong Abril 24, 1973. Ito ang ipinagdiriwang na araw ng pagtatatag ng NDFP.

Ang pambansa-demokratikong pakikibaka ng mamamayang Pilipino ay nakaugat sa armadong rebolusyon para sa kalayaan mula sa Spain noong 1896 at sa paglaban sa pananalakay ng US noong 1899-1913. Sinundan ng mga ito ang mahigit 200 pag-aaklas laban sa kolonyal na paghaharing Espanyol. Binubuo ng lahat ng ito ang isang makapangyarihang rebolusyonaryong tradisyon.



Nang ideklara ang batas militar, sumanib sa kilusang lihim ang Kabataang Makabayan (KM), ang Christians for National Liberation (CNL), MAKIBAKA (ang rebolusyonaryong organisasyong ng kababaihan) at iba pang demokratikong organisasyong idineklara nang ilegal. Sa balangkas ng NDFP, nakipag-alyansa ang mga ito sa PKP at Bagong Hukbong Bayan, na lihim na kumikilos mula pa nang itatag ang mga ito noong Disyembre 1968 at Marso 1969.

Ang rebolusyonaryong kilusang magsasaka, na itinatag at pinaunlad ng PKP at BHB, ay nagsilbing malawak na lambat na nagbibigay ng ligtas na kanlungan at suporta para sa mga kasapi ng NDFP mula sa mga syudad. Kasabay nito, ang mga kadre ng NDFP sa kalunsuran ay tumulong sa napakahahalagang inisyal na pangangailangan ng pamunuan ng rebolusyonaryong kilusan para sa ligtas na mga lugar, komunikasyon, transportasyon at iba pang suportang pampolitika at materyal.

Noong 1975, matapos ang ilang pagbabago sa pamunuan dahil sa mga pag-aresto, ang organisasyon ng NDFP ay kininis ni Kasamang Edgar Jopson, pinuno ng NDFP PrepCom at dating lider estudyante. Sinimulan ng NDFP PrepCom noong 1976 ang programang GZ-Prep (Guerrilla Zone Preparation). Sa ilalim ng programang ito, ang mga ligal na aktibista, na karaniwa'y mga progresibong taong-simbahan, ay nagsasagawa ng ligal na pag-organisa ng mga magsasaka at kalau-na'y ipinapasa ito sa mga rebolusyonaryong pwersa na siyang nagpapaunlad sa mga sonang gerilya. Tumulong ito sa pagpapalawak ng hanggang 29 na mga larangang gerilya pagsapit ng katapusan ng dekada 1980.

Noong Nobyembre 1977, pinalawig ng NDFP ang 10-Puntong Programa nito. Nagbunga ito ng

12-Puntong Programa na may hitalay na mga artikulo tungkol sa kilusang kababaihan at mga Moro at iba pang pambansang minorya.

Ang kalakhan ng gawain ng mga alyadong organisasyon ng NDFP ay nasa malawak na kanayunan. Itinatatag ang mga organisasyong masa ng mga magsasaka at manggagawang bukid, manggagawa, kababaihan, kabataan, mga grupong pangkultura at mga bata. Bilang tugon sa saligang pangangailangan ng mga

magsasaka, isinusulong ang mga kampanyang masa para sa reporma sa lupa, kalusugan, edukasyon, kultura at pagdepensa sa sarili. Binubuo ang mga organo ng kapangyarihang pampolitika o alternatibong guberno sa antas-baryo, habang pinalalakas ang BHB at PKP.

Noong 1980, idineklara ng Permanent People's Tribunal (PPT) ang NDFP bilang lehitimong kinatawan ng mamamayang Pilipino. Kinilala ang katayuang nakikidigma nito at ang pagiging lehitimo ng rebolusyonaryong armadong pakikibaka na isinusulong nito. Idineklara ng PPT na ang diktador na si Marcos ay wala sa katayuang mamuno at tinuligsa ang kanyang rehimen sa malalalang krimen laban sa mamamayan.

Noong 1992, inilunsad ng PKP ang Ikalawang Dakilang Kilusang Pagwawasto upang ituwid ang malalalang pagkakamali na iniudyok at isinagawa ng isang maliit na grupo na naging traydor sa pamunuan ng PKP. Lahat ng ibang alyadong organisasyon ng NDFP ay nakiisa sa PKP at sa masa sa pagsusulong ng kilusang ito na sa kalakha'y isinagawa para tukuyin, iwaksi at iwasto ang mga pagkakamali. Niya-kap ng malaking mayorya ng mga

kadre at kasapi ng rebolusyonaryong kilusan at ng masa ang kilusang pagwawasto habang tumanggi ang maliit na grupo ng mga taksil na tanggapin ang kanilang responsibilidad at tumalikod sa rebolusyonaryong kilusan at mamamayan.




Inilatag ng Ikalawang Dakilang Kilusang Pagwawasto ang pundasyon para sa mabilis na paglago, konsolidasyon at paglawak, kabilang na ang pagbabalik sa mga naiwang erya at mga komunidad. Mula noon, pinalawak at pinalalim ng mga alyadong organisasyon ng NDFP ang kanilang gawain sa hanay ng masa sa kanayunan at kalunsuran.

Kabilang sa mga kongkretong halimbawa ng rebolusyonaryong gawain sa masa ang sumusunod:

Sa usapin ng reporma sa lupa, idineklara sa programa ng NDFP ang pagsasakatuparan ng programa para sa tunay na reporma sa lupa, ang paghikayat ng kooperasyong agrikultura, pagpapaunlad sa produksyon at empleyo sa pagmodernisa ng agrikultura at industrialisasyon ng kanayunan at pagtiyak sa sustenidong produksyong agrikultural.

Sa Mindanao, isinagawa ng mga rebolusyonaryong pwersa ang kampanyang "balik-bukid" noong 2006. Pinagbabawalan noon ang mga magsasaka na magbungkal ng lupa ng isang empresang multinasyunal na umaangkin ng 400,000 ektaryang lupa at gumagamit ng militar, pulis at pribadong pwersang panseguridad. Subalit nagpu-nyagi sa kampanya ang mga magsasaka, na may suporta ng BHB, hanggang parami nang paraming mga magsasaka ang nakapwesto sa mga erya na hindi tuluy-tuloy na mabantayan ng mga gwardya. Pangunahing itinamin nila ang palay,



mais at mga gulay. Kabilang sa kampanyang balik-bukid ang pormasyon ng mga asosasyon ng mga magsasaka at mga kooperatiba, palitan ng lakas-paggawa at produksyong komunal.

Noon ding 2006 sa Cagayan Valley, mahigit 71,000 magsasaka sa 52 barangay sa walong bayan ang nakinabang sa mga pakikibakang agraryo sa kabila ng matinding mga operasyong militar at panggigipit. Napababa ng mga magsasaka ang interes sa kanilang mga utang mula 7% kada buwan tungong 2.5%. Sa ibang erya, napababa ang upa sa lupa sa sangkapat ng netong produksyon mula sa dating sangkatlo ng kabuuang produksyon. Sa ibang barangay, tuluyan nang huminto ang mga kasamâ sa pagbayad ng upa sa lupa.

Sa rehiyon ng Bicol, napababa ng rebolusyonaryong kilusan ang upa sa lupa sa mahigit 35,000 hektarya, na pinakinabangan ng mahigit 10,000 pamilya.

Ang programang pangkalusugan ng NDFP ay nagdidiin sa mga serbisyo para sa pag-iwas sa sakit, na may espesyal na atensyon sa *primary health care* at pagpapalakas ng paglahok sa mga programang nakabase sa masa. Isinusulong nito ang epektibo at angkop na teknolohiya at ang paggamit kapwa ng tradisyunal at modernong medisina.

Kongkretong halimbawa ang

kampanyang anti-malarya sa Cagayan Valley. Alalahanin natin na umaabot sa 10 milyon sa 65 probinsya ang apektado ng malarya. Naglunsad ng pagsasanay sa malarya ang panrehiyong kumand ng BHB sa hanay ng 24 na medik ng BHB at 25 medik mula sa masa. Kabilang sa pagsasanay ang maagang pagtukoy at dayagnosis ng mga palatandaan at sintomas ng malarya, pag-iiba ng malarya sa iba pang sakit na may katulad na sintomas at mga bagong paraan ng paggagamot at pag-iwas sa sakit. Ang mga nagtapos sa pagsasanay ang nanguna sa pagbubuo ng mga komiteng pangkalusugan sa baryo. Nag-sanay din sa akupangkтура ang mga kasapi ng komite.

Sa isa sa mga baryo, isinailalim sa akupangkтура ang isang matandang babaeng limang taon nang paralisado. Ipinagpatuloy ng mga kasapi ng komite ang akupangkтура kahit nakaalis na ang mga medik ng BHB. Matapos ang tatlong linggo, nakatanggap ang mga medik ng sulat: "Nakalalakad na si lola, kailan kayo babalik?"

Sa loob ng tatlong buwan, 2,000 ang nabigyan ng serbisyong medikal at 10 klinika sa baryo ang naitayo. Siyam ang sumapi sa BHB.

Isa sa mga mayor na kampanya ng BHB at mga rebolusyonaryong pwersa ang literasiya at numerasiya. Sa ilang erya, naitayo na ang mga rebolusyonaryong paaralang elementarya. Bahagi ito ng pambansang programa ng NDFP para sa pagpapatuloy ng edukasyong di pormal, espesyal at para sa mga nakatatanda para maturuan silang magbasa, magbilang at magkwenta at magkaroon sila ng iba pang angkop na kasanayan para sa produksyon.

Ang mga programang pangkultura ay importanteng bahagi rin ng

aktibidad ng mga rebolusyonaryong pwersa. Ipinakikita ang kalagayan at pakikibaka ng masa sa pamamagitan ng mga pagtatanghal, awit at tula. Kaya mula simula, paglaging malaki ang papel ng mga programang pangkultura sa pagtaas ng kamulang pampulitika at sigla ng masa.

Ang mga yunit para sa pansariling depensa ay binubuo at sinasanay. Tinutulungan ng mga ito ang BHB sa pagbibigay-proteksyon sa mga komunidad at paglulunsad ng mga taktikal na opensiba.

Sa kalunsuran, itinataguyod ng mga alyadong organisasyon ng NDFP ang mga pakikibaka ng mga manggagawa, ang rebolusyonaryong kilusang masa, ang pakikibaka para sa karapatang-tao at gawaing pampulitika sa loob ng mga reaksyunaryong institusyon. Nakiikisa sila sa masa sa kampanya para patalsikin ang bulok, ilegal at brutal na rehimeng Arroyo. Tumutulong sila sa pagbubuo ng mga alyansa para palawakin ang pambansang nagkakaisang prente sa balangkas ng kabuuang rebolusyonaryong pakikibaka.

Sa ibang bansa, itinataguyod ng mga alyadong organisasyon ng NDFP ang gawain sa hanay ng mga Pilipinong nangibang-bansa upang ipaglaban at itaguyod ang kanilang mga karapatan at paunlarin ang kanilang paglahok at pagsuporta sa mapagpalayang pakikibaka ng mamamayang Pilipino. Pinauunlad rin nito ang internasyunal na pakikiisa sa mamamayan ng ibang bansa at pinauunlad ang kooperasyong pakipakinabang sa magkabilang panig sa pakikibaka laban sa imperyalistang globalisasyon at mga mapanalakay na gera.

Nagsasagawa rin ito ng panimulang gawaing diplomatiko upang makuha ang suporta at pag-

kilala ng mga gubyrerno at institusyong intergubyrerno sa ibang bansa. May tungkulin ang NDFP Negotiating Panel at ang mga konsultant, istap at boluntir nito na harapin sa negosasyong pangkapayapaan ang reaksiyunaryong gubyrerno.

Natamo ang pag-unlad at mga tagumpay nitong nagdaang 35 taon dahil sa suporta ng masa. Binibigyang-pugay natin ang mga martir at bayani ng masa at ang mga lider ng NDFP na nagbuwis ng buhay para sa mamamayan at rebolusyong Pilipino. Pinararangalan din natin ang ating mga kaibigang internasyunalista na nagbigay at patuloy na nagbibigay ng taos-pusong serbisyo sa mamamayang Pilipino.

Sa matatag na pundasyon ng 35 taon ng maningning na rebolusyonaryong pakikibaka, tiwala tayo sa pagkamit ng marami pang tagumpay sa mga darating na taon hanggang matamo natin ang pambansang tagumpay sa pakikibaka para sa pambansa at panlipunang paglaya. AB



Nagpapanibagong-sigla ang rebolusyong agraryo sa Negros

Muling sumisigla ang rebolusyong agraryo sa Negros kasabay ng pag-igting ng armadong pakikibaka.

Sa isang larangang gerilya, nai-pagtagumpay ng mga magsasaka ang pagpapataas ng presyo (*farmgate price*) ng kape, kopra at iba pang produktong agrikultural na binibili sa kanila ng mga komersyante bunga ng serye ng pakikipagdayalogo ng mga delegasyon ng mga magsasaka sa kanila. Nakamit nila ang pagpapataas ng *farmgate price* ng kopra mula ₱0.50 tungong ₱1.50/kilo; at kape, ng ₱2 tungong ₱5/kilo.

Nakamit din ng mga manggagawang bukid ang halos dobleng pagpapataas sa kanilang arawang sahod. Binabayaran na sila ngayon ng ₱120 mula sa dating ₱70. May dagdag ding ₱10/oras kapag lampas walong oras ang kanilang pagtatrabaho. Dalawang piso naman bawat araw ang umento sa pagtatahip.

Umaabot na sa 17 baryo ang nabibiyayaan ng mga panimulang tagumpay na ito ng kilusang magbubukid sa isla. Nahikayat ding kumilos ang iba pang mga alyadong organisasyon at indibidwal sa kanayunan. Dagdag ding salik ang tuluy-tuloy na

pagtulong ng mga taong-simbahan, mga upisyal ng barangay at pamahalaang bayan at ilang panggitnang pwersa.

Kumakalat ngayon na parang apoy ang balita hinggil sa mga tagumpay na ito sa mga kanugnog na baryo, bayan at distrito. Ito ngayon ang nagpapatatag sa iba pang mga magsasaka at manggagawang bukid na buuin ang kanilang organisadong lakas at ipaglaban ang kanilang mga karapatan.

Sa isang baryo, matagumpay nilang napigilan ang tangka ng isang panginoong maylupa na palayasin ang mga magsasakang nagbubungkal sa inaangkin niyang lupa. Gumamit ng mga bayarang *goons* at “blue guards” ang asendero ngunit binigo ang mga ito ng militanteng pagkilos ng mga magsasaka kasama ang iba pang sektor.

Sa isang baybaying lugar, tinangkang palayasin din ng isang negosyante ang may 100 pamilyang naninirahan doon. Ngunit pansamantalang iniatras ng negosyante ang kanyang proyektong ekoturismo sa nasabing lugar bunsod ng mahigpit na organisadong pagtutol ng mga residente roon. AB

Pagpapalawig sa huwad na reporma sa lupa, kinundena

BINATIKOS kamakailan ng mga progresibong partido at organisasyon ang limang-taong pagpapalawig ng Comprehensive Agrarian Reform Program (CARP) na inaprubahan ng Kongreso nitong Abril 23.

Anila, ang pagpapatupad ng CARP ay nagdulot lamang ng malawakang pagpapalit-tanim at pagpapalit-gamit ng lupa. Bunga nito ay nabawasan ang kakayahan ng

bansa na tugunan ang pangangailangan nito sa bigas.

Tinukoy nila ang kaso ng South Cotabato kung saan mula sa pagtanim ng palay, naging pangunahing produkto nito ang pinya, saging, asparagus at papaya para sa eksport. Bago ang CARP, natutugunan ng Mindanao ang pangangailangan sa bigas di lamang ng isla kundi pati ng ilang prubinsya sa

Kabisayaan. Ngayon, kailangan na nitong mag-angat ng bigas.

Ayon sa datos ng NSO, mula sa 9.9 milyong ektarya ng lupang sinasaka noong 1991, bumaba ito sa 9.7 milyong ektarya na lamang noong 2002. Bumaba rin ang lupang tinatamnan ng palay mula 4.13 milyong ektarya noong 2004 tungong apat na milyong ektarya noong 2005. AB



Matatagumpay na taktikal na opensiba ng BHB sa Southern Mindanao at Bicol

Muling nagpakita ng kasigasigan at tapang ang Bagong Hukbong Bayan sa Southern Mindanao nang maglunsad ito ng iba't ibang taktikal na opensiba nitong mga nakalipas na linggo.

Mayo 5. Tatlong sundalo ng Charlie Company ng 39th IB ang namatay at 18 iba pa ang nasugatan sa pananambang na isinagawang Bagong Hukbong Bayan (BHB) bandang alas-5 ng umaga sa Barangay Ilustre, President Roxas, North Cotabato. Kabilang sa mga nasugatan ang punong upisyal ng nasabing yunit na nakilala lamang bilang 1Lieutenant Nemesis.

Halos mag-iisang linggo nang ginagalugad ng mga tropang militar ang Arakan Valley nang mangyari ang ambus. Pabalik na sa kanilang kampo ang mga sundalo sakay ng dalawang trak nang pasabugan sila ng *command-detonated land mine*.

Noong araw ding iyon, namatay sa ambus ng mga operatiba ng BHB sa Barangay Estanza, Legazpi City si Supt. Narciso Guarin habang papasok siya sa kanyang upisina sa Camp Simeon Ola. Ayon kay Greg

Bañares, tagapagsalita ng NDF-Bicol, si Guarin, na kasalukuyang *deputy chief* ng Regional Police Personnel Office ay dating hepeng paniktik ng PNP sa Albay at dati ring hepe ng pulisya ng Ligao City.

Abril 27. Limang malalakas na armas ang nasamsam matapos ambusin ng mga Pulang mandirigma ang pinagsanib na pwersa ng 28th at 73rd IB sa Sityo Palina, Barangay San Isidro, Monkayo, Compostela Valley dakong alas-2 ng hapon. Apat na sundalo at dalawang elemento ng CAFGU ang namatay sa ambus. Dalawang elemento rin ng CAFGU at isang sundalo ang nasugatan sa pananambang na tumagal nang 30 minuto. Nakumpiska ang dalawang Armalite AR18 *assault rifle*, isang M14 at dalawang garan.

Dahil sa matinding kahihiyan, pinalabas ng mga militar na kasalanan ng BHB ang pagkakasugat ng dalawang batang babae na magkapatid. Nasugatan sina Rebecca, 6 taong gulang at Jinky Estancia, 9 na taong gulang. Ayon sa mga magulang ng mga bata, binigyan pa ng paunang lunas ng mga mandirigma ang dalawang nasugatan at isinakay sa motorsiklo patungong ospital.

Nagbigay pa ng pera ang mga mandirigma para sa kanilang pagpapagamot dahil walang naibigay na tulong ang mga militar. Sa halip ay ginamit lamang ni-

lang paninira ang naganap na ambus sa kanilang tropa.

Noong araw ding iyon, dalawang sundalo naman ang naging *prisoner of war* o POW ng mga mandirigma nang sila ay hiwalay na hulihan sa isinagawang tsekpoynt sa Barangay Upper Ulip, Monkayo, Compostela Valley. Ang mga binihag ay sina S/Sgt. Huberto Corbita ng K-9 unit ng 28th IB at si S/Sgt. Napoleon Jasmeo ng 11th Regional Command Defense Group.

Pinalaya ang dalawang bihag nitong Mayo 6 sa makataong batayan. Ayon kay Rigoberto Sanchez, tagapagsalita ng Merardo Arce Command-BHB sa Southern Mindanao, iginalang at pinangalagaan ng BHB ang mga karapatan ng dalawa bilang mga POW.

Abril 26. Isang elemento ng CAFGU ang namatay at isang sundalo ang nasugatan matapos lusubin ng mga Pulang mandirigma ang detasment ng 50th IB sa Sityo San Miguel, Barangay Sta. Fe, New Corella, Davao del Norte.

Abril 21. Isang sundalo ang nasugatan matapos makasagupa ng mga Pulang mandirigma ang mga tropa ng 1001st Bde ng Philippine Army sa Sityo Kalamokan, Barangay Andap, New Bataan, Compostela Valley. Ang nasabing labanan, na naganap ng alas-7:15 ng umaga ay bunsod ng matinding operasyong militar na inilulunsad ng 10th ID sa nasabing lugar.

Malawakang ebakwasyon ang nagaganap sa New Bataan sa kasalukuyan dahil sa walang humpay na pananalasa ng militar at apektado na ang kabuhayan ng mamamayan doon.



Pang-aabusong militar sa Quezon City at South Cotabato

Pambubugbog at ilegal na pang-aaresto ang tampok sa mga paglabag sa karapatang-tao noong huling linggo ng Abril.

Abril 28. Tatlong sundalo, kabilang ang dalawang tinylene ang nambubugbog kay Olpiano Santillan, 40, sa Payatas, Quezon City. Pawang mga elemento ng National Capital Region Command ng AFP ang tatlo at nakatalaga sa gawaing "civil-military operations" sa Payatas.

Nag-aaway sina Santillan at kanyang asawa nang mapadaan sila sa tatlong sundalong nag-iinuman sa harap ng *barangay hall*. Sinita

sila ng tatlong sundalo at dinala si Olpiano sa loob ng *barangay hall* kung saan nakahimpil ang mga ito. Paulit-ulit na hinataw ng isang pirasong tabla sa likurang bahagi ng kanyang hita si Olpiano habang hinahawakan siya ng dalawang sundalo sa braso. Nagkapasa-pasa ang kanyang katawan matapos siya pagsusuntukin.



Abril 26. Arbitraryong inaresto at ikinulong ng mga elemento ng Criminal Investigation and Detection Group (CIDG) sa Central Mindanao at Intelligence Service of the Armed Forces of the Philippines (ISAFP) si Jeramil Benedicto, isang magsasaka.

Katatapos lamang ng seremonya ng kanyang kasal sa Cannery Village, Polomolok, South Cotabato nang sumalakay ang mga elemento ng CIDG at ISAFP. Inaresto si Benedicto dahil kasapi umano siya ng Bagong Hukbong Bayan (BHB) sa hangganan ng Saranggani at Davao del Sur.

Walang ipinakitang *warrant of arrest* ang mga pulis. **AB**

Daan-daang pamilya, lumikas sa Compostela Valley

DAAN-DAANG pamilyang Lumad ang lumikas mula sa kanilang mga tirahan dahil sa matinding militarisasyon sa mga hangganan ng New Bataan at Compostela sa Compostela Valley at Baganga sa Davao Oriental. Tumungo sila sa sentrong bayan at iba pang mga ligtas na barangay. Nagsimulang salakayin ng 28th, 30th, 67th at 72nd IB sa ilalim ng kumand ng 1001st Bde ang tatlong bayan noong Abril 5. Si Brig. Gen. Carlos Holganza ang nangangasiwa sa brigada.

Bukod sa pwersahang pagpapalikas, nagdudulot ang operasyong militar ng marami pang kaso ng paglabag sa karapatang-tao tulad ng intimidasyon, panghahas, *food blockade*, pagkakampo ng militar sa mga bahay at iba pang lugar ng mga sibilyan at paninira ng mga ari-arian. Maraming hayop na ang kinatay ng mga sundalo at pinutol ang mga puno, abaka at iba pang pananim.

Isang siyam na buwang gulang na sanggol na kabilang sa tribong Mandaya ang namatay sa isang *evacuation center*. Mahina ang katawan ng bata nang makarating sa sentrong bayan. Tumaas ang lagnat nito subalit hindi maipagamot dahil walang ospital sa lugar. May iba pang mga batang maysakit, lalupa't kulang ang pagkain sa mga *evacuation center*.

Samantala, di bababa sa 400 pamilya ang lumikas dahil sa pambo-bomba ng militar sa isang kampo ng Moro National Liberation Front (MNLF) sa Indanan, Sulu noong madaling araw ng Abril 30. Abril 29 nang mag-umpisa ang operasyong militar. Pansamantalang nagkakanlong ang mga sibilyan sa Sityo Talatak, Barangay Bato-bato. Tapos na ang operasyon subalit nangangamba pa rin ang mga residente na mau-ulit ang pambobomba. **AB**

Mga sundalong sangkot sa masaker sa Sulu, hindi pa nakakasuhan

TATLONG buwan na matapos ang pagmasaker ng militar sa walo katao noong Pebrero 4 sa Barangay Ipil, Maimbung, Sulu. Pero hanggang ngayon ay wala pang kasong kriminal na naisasampa laban sa mga salarin. Kasama sa mga biktima ang mga batang apat at siyam na taong gulang at isang buntis.

Iginigiit ng militar na lehitimong engkwentro sa bandidong Abu Sayaff ang pangyayari sa kabila ng pahayag ng Commission on Human Rights (CHR) na walang habas na pamamaslang ang naganap. Tinukoy na ng CHR ang sangkot na mga yunit ng militar subalit ikinukubli pa rin ng AFP ang pangalan ng mga salarin.

Samantala, nagkukumahog ang upisina ni AFP *chief of staff* Gen. Hermogenes Esperon na bayaran na lamang ng tig-P200,000 na "blood money" ang pamilya ng bawat biktima. **AB**



Mga mambabatas sa Canada, nababahala

NAGPAHAYAG ng labis na pagkabahala ang mga myembro ng Parlamento sa Canada sa nagpapatuloy na mga pampulitikang pamamaslang sa Pilipinas na isinasagawa ng militar. Base ito sa ulat na isinumite nina Rep. Crispin Beltran, Luz Ilagan at Satur Ocampo sa House of Commons Subcommittee on International Human Rights sa Canada. Umaabot na sa 902 ang mga biktima ng pampulitikang pamamaslang at 180 naman ang biktima ng *enforced disappearances* sa ilalim ng administrasyon ni Gloria Arroyo.

Ikinabigla rin ng mga myembro ng subkomite ang laman ng mga ulat nina UN Special Rapporteur Prof. Philip Alston at Judge Jose Melo ng Melo Commission hinggil sa mga paglabag sa karapatang-tao sa bansa.

Planong isumite ng mga mambabatas na Canadian sa Kongreso sa Pilipinas ang mga rekomendasyon ng tatlong Pilipinong kongresista tungkol sa mga aksyong maaaring gawin ng mga mambabatas sa Canada.

Nanawagan ang tatlong Pilipinong mambabatas sa subkomite na igiit sa gubyrerno ng Canada ang pagpresyur sa rehimen ng Arroyo na itigil ang mga paglabag sa karapatang-tao.

Ipinanawagan din ang pagreposito ng Canada sa mga ayuda nito sa gubyrerno ng Pilipinas tulad ng Military and Police Training Assistance Programs, pamumuhunan sa pagmimina at ayudang pangkaunlaran at tingnan kung nagagamit ang mga ito sa mga paglabag sa karapatang-tao. **AB**

Krisis sa pagkain, nagpataalsik sa rehimen sa Haiti

Bumagsak noong Abril ang papet na gubyrerno ni Prime Minister Jacques Edouard Alexis ng Haiti dahil sa malawakang pag-aalsa ng mamamayan bunsod ng nagtataasang presyo ng pagkain. Ang Haiti, na matatagpuan sa Caribbean Sea, ang pinakamahirap na bansa sa Latin America.

Ang pagsirit ng presyo ng pagkain, laluna ng bigas, sa Haiti ay bunga ng halos dalawang dekadang pagkawasak ng lokal na agrikultura nito. Tulad ng nangyari sa iba pang mga maralitang bansa, sistematikong sinira ng IMF-World Bank ang kakayahan ng mga magsasaka ng Haiti na magprodyus ng palay para magsilbing merkado ang bansa para sa sobrang bigas mula sa US.

Napilitan ang gubyrerno ng Haiti noong 1986 na bawasan ang mga taripa para sa bigas at iba pang produktong agrikultural kapalit ng lubhang kinakailangang \$24.6 milyong ayuda mula sa IMF.

Sa loob lamang ng dalawang taon, nawalan na ng kakayahan ang mga lokal na magsasaka na makipagkumpitensya sa dumagsang bigas mula sa US na tinaguriang "Miami rice." Maraming magsasaka ang tumigil na sa pagtanim, nawalan ng hanapbuhay at nagsilikas patungong kalunsuran para maghanap ng ibang mapagkakakitaan. Kung dati'y kaya ng Haiti na tugunan ang halos lahat ng pangangailangan nito sa bigas, pagsapit ng 2008 ay naging ikatlong pinakamalaking tagapag-angkat ng bigas ito mula sa US.

Mahigit 240,000 metriko tonelada ng bigas ang iniimport ngayon ng Haiti taun-taon. Sa kabila nito, umabot pa sa \$51 ang bawat 50-kilong sako ng bigas doon nang maganap ang mga pag-aalsa. Imposi-

ble itong makayanan ng mayorya ng mga Haitian dahil mahigit kalahati ng populasyon ay kumikita lamang ng wala pang \$1 bawat araw.

Maging ang produksyon ng asukal ay bumagsak bunga ng ipinataw na liberalisasyon sa agrikultura. Kung dati'y pinakamalaking eksporter ng asukal ang Haiti sa Europe, ngayo'y napipilitan na rin itong mag-angkat ng asukal mula sa US at mga kumpanya sa Dominican Republic na pagmamay-ari rin ng mga Amerikano.

Habang walang awang binangkrap ng IMF-World Bank ang mga magsasaka ng Haiti, bigay-to-do naman ang mga subsidyo sa mga prodyuser ng palay sa US. Tatlong iba't ibang klase ng subsidyo ang tinatamasa nila mula sa gubyrerno, na nagkahalaga ng \$11 bilyon mula 1995 hanggang 2006. May ipinapataw ding mula 3% hanggang 24% na taripa ang gubyrerno ng US laban sa pagpasok ng bigas mula sa ibang bansa. Dahil dito, kaya ng US na magprodyus ng sobra-sobrang dami ng murang bigas na siyang itinatambak nito sa mga bansang wasak na ang kakayahang magprodyus ng sariling suplay ng butil.

Ang pagiging hipokrito at ang kasakiman ng imperyalismong US ang ugat ng karalitaan at kagutuman ng bilyun-bilyong mamamayan ng daigdig at gumagatong sa ligalig na laganap ngayon sa buong mundo. **AB**



Malawak na kagutuman at kaguluhan

Ang mga patakaran ng imperyalistang globalisasyon na mapangwasak sa mga produktibong pwersa at nagbunsod ng malawakang krisis sa pagkain ay nagiging sanhi ngayon ng laganap na ligalig sa maraming dako ng mundo. Umaalingawngaw sa pinakahikahos na mga bansa ng daigdig ang daing ng mga nagugutom at sa ilang lugar ay humahantong na ito sa pagsiklab ng karahasan.

Sa Asia. Noong Abril 12, humigit-kumulang 20,000 manggagawa sa Bangladesh ang lumabas sa lansangan para kundenahin ang nagtataasang presyo ng pagkain at maggiit ng karagdagang sahod. Ilampu sa kanila ang nasugatan nang magpaputok ng baril ang mga pulis para buwagin ang kanilang hanay.

Dinahas din ng pulisya ang martsa ng daan-daang demonstrador sa Phnom Penh, Cambodia noong Abril 6 laban sa pagtaas ng presyo ng pagkain.

Sa Sri Lanka, kumukulo ang galit ng mamamayan sa mabilis na pagsirit ng mga presyo ng saligang pagkain at inumin, gayundin ng pamasaha at upa sa bahay. Halos dumoble na ang presyo ng bigas doon mula noong Enero. Inihayag pa ng gubyrerno na maaaring matriples ang presyo ng tinapay sa pagtatapos ng taon. Nagpapasidhi pa sa galit ng mamamayang Sri Lankan ang higit na prayoridad na ibinibigay ng gubyrerno ni Pres. Mahinda Rajapakse sa gera laban sa mga rebolusyonaryong Tamil na malaking salik sa pagtaas ng presyo ng pagkain sa bansa.

Sumisiklab din ang katulad na mga protesta sa Pilipinas, Indoneisa, Thailand, India, Pakistan, Uzbekistan at iba pang bansa sa Asia.

Sa Latin America. Sa Peru, dumadagsa sa lansangan ang mga tao para tutulan ang nagtataasang presyo ng pagkain at igiit ang renegosasyon ng tagibang na kasunduan

sa “malayang kalakalan” ng gubyrernong Peruvian at US. Ang naturang kasunduan ang sinisisi ng mamamayang Peruvian sa tumataas na disempleyo sa bansa. Ang kaguluhang ibinubunga nito ngayon ay yumayanig sa mapaniil na gubyrerno ni Pres. Alan Garcia.

Sa Haiti, napatalsik ang gubyrerno bunga ng serye ng mga pag-aalsang bayan laban sa pagtaas ng presyo ng pagkain.

May mga katulad ring kaguluhan sa Mexico at Bolivia.

Sa Africa at sa Middle East. Hanggang 140% ang itinaas ng mga batayang pagkain sa rehiyon kagaya ng manok, trigo, bigas at mantika.

Nitong Mayo 5, di bababa sa dalawa katao ang napatay nang pagbabarilin ng mga tropang militar ang ilampung libong taong nagpoprotesta sa nagtataasang presyo ng pagkain sa Mogadishu, kabisera ng Somalia. Mahigit doble na ang presyo ng mais sa Somalia mula nitong Enero at tumaas na mula \$26 tungong \$47.50 ang presyo ng isang 50-kilong sako ng bigas sa parehong panahon.

Noong ikalawang linggo ng Abril, dalawa ang napatay at daan-daan ang inaresto ng pulisya sa kilos protesta ng mga manggagawa sa Mahalla al-Kobra sa Egypt. Dalawang araw na pangkalahatang welga naman ang inilunsad ng mga manggagawa sa Burkina Faso. Mahigit isandaan ang napatay sa mga kilos protesta sa Cameroon.

Noong unang bahagi ng Abril,



libu-libo ang nagmartsa tungo sa tirahan ni Presidente Laurent Gbagbo ng Ivory Coast laban sa lumalalang gutom. Binuwag ng pulisya ang kilos protesta sa pamamagitan ng tigas at mga batuta at labindalawa katao ang nasaktan.

Samantala, may mga hakbang ding ginagawa ang mga gubyrerno sa ilang bansang tinatamaan ng taggutom. Ilang gubyrerno sa Latin America ang nagsama-sama upang maglaan ng \$100 milyong pondo para tiyakin ang seguridad sa pagkain ng mga bansa sa rehiyon. Ang pondo ay gagamitin para pataasin ang produksyon ng palay, mais at *beans* upang kontrahin ang tumaas na presyo ng pagkain. Nagkasundo rin ang mga pinuno ng Venezuela, Bolivia, Nicaragua at Cuba na magpatupad ng pinag-isang mga programa sa pagpapaunlad ng agrikultura.

Ang ilang bansa naman ay nagpaplano o nagsimula nang magbawal ng pagluluwas ng bigas at ibang pagkain para tiyakin ang lokal na suplay. Ganito na ang naging hakbang ng Bolivia, Brazil at India. Nagpapanukala naman ang Thailand na magbuo ng kartel sa bigas kasama ang Burma, Cambodia at Vietnam para maitakda nila ang presyo ng bigas sa pandaigdigang pamilihan.

AB

Burukrasya para sa mga alipures ni Arroyo

WALANG kapararakan ang paghirang ni Arroyo ng masusugid niyang alipures sa mga pwesto sa gubyerno. Punung-puno ito ng pinakatapat niyang kaibigan at tagasuporta, pati na rin ng mga dating upisyal ng militar at pulis.

Sa ilalim ng kasalukuyang rehimen, 56% ng mga hinirang sa burukrasya ay wala kahit isa sa mga rekisito para maging upisyal ng gubyerno, kabilang ang 113 sa 203 *undersecretary* at *assistant secretary*. Sa kabuuan, nagpasok si Arroyo ng 81 *undersecretary* at *assistant secretary*, bukod pa sa 53 *presiden-*

tial adviser at *presidential assistant* at mga konsultant.

Ang mga upisyal na ito ay binibigyan ng sariling upisina, mga sasakyan, istap at badyet. Umaabot sa ₱65 milyon sa ₱112 milyong ipinaspaweldo sa sangay ng ehekutibo ang napupunta sa napakaraming alipures ng rehimen.

Kabilang sa dambuhalang burukrasyang pinapalamon ni Arroyo ang mahigit nang 90 dating mga upisyal ng militar at pulis na ipinwesto niya sa kung saan-saang ahensya. Kumpara rito, umabot lamang sa 15 ang retiradong upi-

syal sa burukrasya ni dating presidente Corazon Aquino.

Habang lumalaki ang bilang ng mga *political appointee*, napipinto naman ang pagsisante sa 420,000 kawani ng gubyerno alinsunod sa EO 366 na inilabas ni Arroyo noong Oktubre 2004. Ayon kay Ferdinand Gaithe, pangulo ng COURAGE, planong alisin sa trabaho ang 8,120 kawani mula sa National Food Authority, Metro Manila Development Authority, Senado, Bureau of Customs, Bureau of Internal Revenue at Department of Social Welfare and Development.

PKP, bumati sa mga tagumpay ng Nepal at CPN-M

MAINIT na binati ng Partido Komunista ng Pilipinas ang mga mamamayan ng Nepal at ang Communist Party of Nepal (Maoist) sa matagumpay nilang pagkapanalo ng pinakamalaking bilang ng mga kinatawan sa eleksyon para sa Constituent Assembly. Ipinakita ng mga Nepali at CPN-M ang nangungunang papel ng CPN-M sa pagbuwag sa monarkiya, pagtatayo ng demokratikong republika at paglulunsad ng bagong demokratikong rebolusyon.

Kasama ang iba pang progresibo at alyadong partido, maiddirih na ng CPN-M ang pagtatayo ng bagong gubyerno sa Nepal. Malaki ang inaasahang makakamit pang mga tagumpay at maisusulong na pagbabago sa bansa.

Inaasahang magpapatuloy ang mga tagumpay nila sa pagpapatupad ng mga batayang demokratikong reporma upang wasakin ang pagsasamantala at pang-aapi, laluna ang pyudalismo, sistemang *caste*, pang-aapi sa kababaihan at diskriminasyon sa mga pambansang minorya.

Inaasahang makikinabang ang

mga magsasaka sa tunay at lahatangpanig na reporma sa lupa na isasabatas nito. Gayundin, inaasahang mapapasakamay ng mamamayan ang mga instrumento upang matiyak, madepensahan at maisulong ang kaniyang mga tagumpay sa ekonomya at lipunan.


Higit kailanman, ang alyansa ng uring manggagawa at magsasaka, sa ilalim ng pamumuno ng CPN-M ay kailangan upang maisulong ang bagong demokratikong rebolusyon. Ang batayang alyansa ng mga manggagawa at magsasaka ang pundasyon ng mas malawak na alyansa para pagkaisahin at mobilisahin ang mamamayan ng Nepal. Inaasahang ipagtatagumpay nila, sa pamumuno ng CPN-M ang tunay na pambansang kasarinlan, demokrasya, panlipunang hustisya, pag-unlad sa ekonomya, kulturang makabayan at progresibo at pandaigdigang pagkakaisa para sa kapayapaan at pag-unlad laban sa imperyalismo at di-makatarungang gera.

Upang maipatupad ang mga kasunduan ng CPN-M at ng Seven-Party Alliance (alyansa ng pitong mayor na

partido sa Nepal laban sa monarkiya), dapat baguhin ang oryentasyon at istruktura ng estado sa burukrasya at militar upang makapasok dito ang mga rebolusyonaryo dahil kung hindi'y magagamit pa ito ng mga kaaway laban sa bagong gubyerno, sa rebolusyon at sa mamamayan. Kailangan itong maisagawa para makonsolidang ang kapayapaan at maisulong ang pambansa at demokratikong interes ng mga Nepali.

Pagkatapos ng integrasyon ng mga rebolusyonaryo, sistematikong mapaliliit ang nakatayong regular na hukbo habang pinalalawak at pinalalakas ang mga milisya ng mamamayan upang suportahan ang pagpapatupad ng mga batayang demokratikong reporma sa malawakang saklaw.

Bukod sa pagtupad sa kahilingan ng mga magsasaka para sa reporma sa lupa, dapat ding ilunsad ang pambansang industriyalisasyon. Dapat ding magpapatupad ng isang patakarang panlabas na nagsasarili at nagtataguyod ng kapayapaan at pag-unlad laban sa imperyalismo at reaksiyon.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXIX Blg. 9
Mayo 7, 2008
www.philippinerevolution.net

Mga manggagawa at malawak na masang anakpawis

Magkaisa, lumaban at magkamit ng mga tagumpay



Karukhaan, kagutuman at pambubusabos. Matinding kawalan at kakulangan ng trabaho. Sahod alipin. Malulupit na kalagayan sa paggawa at pamumuhay. Papalalang dinaranas ito ngayon ng malawak na masa ng sambayanang Pilipino, laluna ng masang manggagawa, malamanggagawa at mag-sasaka.

Samantala, nabubundat ang mga naghaharing imperyalista at kasabwat nilang malalaking kumprador at burukrata. Inaapi at dinadambong nila ang bayan, hinuhuthot ang likas na yaman, winawasak ang mga produktibong pwersa at kinukulimbat ang kabangyaman ng bansa.

Sa kabila nito ay patuloy na ipinapako ang sahod ng mga manggagawa sa napakababang antas. Itinutulak ng rehimen ang patakaran ng kaswalisasyon at kontraktwalisasyon na lalong nagpapalaki sa bilang ng mga manggagawang wala o kulang sa trabaho. Paparami ang sinisisanteng mga regular na manggagawa. Ginagawang panakip-butas sa malawakang disempleyo sa bansa ang pag-eksport ng milyun-milyong manggagawa.

Sa katindihan ng krisis, ibayo pang pini-piga, ginigipit at sinusupil ng mapagsamantala at brutal na rehimen at kasapakat nitong mga imperyalista at lokal na naghaharing uri ang masang anakpawis. Sadyang pinipigilan

**Mga tampok
sa isyung ito...**

**Pagtanaw sa 35 taon
ng NDFP** PAHINA 4

**Mga opensiba
sa Southern Mindanao** PAHINA 8

**Malawak na kagutuman
at kaguluhan** PAHINA 11

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angba-yan@yahoo.com*